

四庫全書

集部

欽定四庫全書

集部

東坡全集卷二十一  
四

詳校官庶吉士臣謝恭銘

檢討臣何思鈞覆勘

總校官進士臣朱鈐

校對官中書臣牛稔文

謄錄監生臣王邦麟

欽定四庫全書

東坡全集卷二十一

宋 蘇軾 撰

詩六十六首

軾近以月石硯屏獻子功中書公復以涵星硯  
獻純父侍講子功有詩純父未也復以月石  
風林屏贈之謹和子功詩并求純父數句

紫潭出玄雲翳我潭中星獨有潭上月倒挂紫翠屏我  
老不看書默坐養此昏花睛時時一開眼見此雲月眼

自明久知世界如泡影大小真偽何足評笑彼三子歐

蘇梅無事自作雪羽爭

事見三  
人詩集

故將屏硯送兩范要使

珠璧栖牕櫺大范忽長謠語出月脇令人驚

皇甫湜曰  
穿天心出

月脇意外驚  
人語非尋常

小范當繼之說破星心如雞鳴

孟郊聞雞  
詩云似聞

孤月口能  
說落星心

牀頭復一月下有風林橫急送小范家護此

涵星泓願從少陵博一句山水盡與洪濤傾

次韻范純父涵星硯月石風林屏詩

月次于房歷三星斗牛不神箕獨靈簸搖桑榆盡西靡

影落蘇子硯與屏天工與我兩厭事孰居無事為此形  
與君持橐侍帷幄同到溫室觀堯賞自憐太史牛馬走  
技等卜祝均倡伶欲留衣冠挂神武便擊雲水歸南溟  
陶泓不稱管城沐醉石可助平泉醒故持二物與夫子  
欲使妙質留天庭但令滋液到枯槁勿遣光景生晦冥  
上書挂名豈待我獨立自可當雷霆我時醉眠風林下  
夜與漁火同青熒撫物懷人應獨歎作詩寄子誰當聽

次韻錢穆父會飲

彈冠恨不早挂冠常苦遲盛服每假寐角闕時伏思東  
門未祖道西山空挂頤逝將江海去安此麋鹿姿要當  
謀三徑何暇擇一枝與君幾合散得酒忘淳漓君談似  
落屑我飲如奕棋世有作詩如奕棋奕棋如飲酒飲酒居  
乃天戒之語僕於棋酒二事皆不能也  
官不任事造物真見私主人獨賢勞金穀方流馳行人  
亦結束杖杜乃歸期公卿雖少安河流正東醜我得會  
稽去方回良不癡

次韻穆父尚書侍祠郊丘瞻望天光退而相慶

引滿醉吟

千章杞梓蔭雲天  
樗散誰收老鄭虔  
喜氣到君浮白裏  
豐年及我挂冠前  
令嚴鐘鼓三更月  
野宿貔貅萬竈烟  
太息何人知帝力  
歸來金帛看頰肩

郊祀慶成詩

帝出乘昌運  
天心予太平  
文章三代繼  
制作七年成  
大祀乾坤合  
剛辰日月明  
泰壇朝掃地  
魄寶夜垂精  
仰御圓蒼蓋  
環觀海嶽城  
北流吞朔易  
西極落攬搶  
升燎靈

光荅回鑒瑞霧迎需雲徧枯槁解雨達勾萌可頌非天  
德因箴亦下情民言知有酌帝謂本無聲富國由崇儉  
祈年在好生無心斯格物克己自消兵化國安新政孤  
臣反舊耕還將清廟什留與野人賡

次韻奉和錢穆父蔣穎叔王仲至詩四首

見和西湖月下聽琴

謾謾松下風藹藹壠上雲聊將竊比我不堪持寄君半  
生寓軒冕一笑當琴尊良辰飲文字晤語無由醺我有



鳳鳴枝背作蛇蚶紋月明委靜照心清得奇聞當呼玉

澗手一洗羯鼓昏請歌南風曲猶作虞書渾

家有雷琴甚奇古玉

澗道人崔閑妙於雅聲當呼使彈

### 見和仇池

上窮非想亦非非下與風輪共一癡翠羽若知牛有角  
空餅何必井之脣還朝暫接鷓鴣翼謝病行收麋鹿姿  
記取和詩三益友他年弭節過仇池

### 玉津園

承平苑囿雜耕桑六聖勤民計慮長碧水東流還舊派

玉津分蔡河上  
流復合于下

紫壇南峙表連岡不逢遲日鶯花亂空

想疎林雪月光千畝何時躬帝藉斜陽寂歷瑣雲莊

藉田

竊脂方紀瑞布穀未催耕魚沫依蘋渚蝸涎上綵楹江  
湖來夢寐蓑笠負平生琴裏思歸曲因君一再行

頃年楊康功使高麗還奏乞立海神廟於板橋僕  
嫌其地湫隘移書使遷之文登因古廟而新

之楊竟不從不知定國何從見此書作詩稱  
道不已僕不復記其云何也次韻荅之

退之仙人也遊戲於斯文談笑出偉奇鼓舞南海神頃

年三韓使幾為鮫鰐吞歸來築祠宇要使百賈奔

板橋商賈

所聚我欲遷其廟下數浮空羣

謂登州海市

移書竟不從信非

磊落人公胡為拳拳繫此空中雲作詩頌其美何異刻  
劍痕我今已括囊象在六四坤

沐浴啓聖僧舍與趙德麟邂逅

南山北闕兩非真東顧西湖迹已陳  
季子來歸初可喜  
老聃新沐定非人酒清不醉休休暖  
睡穩如禪息息勻  
自笑塵勞餘一念明年同泛越溪春

次韻王仲至喜雪御筵

三軍喜氣鑠飛花睡起空驚月在沙  
未集驂駟金駉裊  
故殘鳩鵲玉橫斜偶還仗內身如寄  
尚憶江南酒可賒  
宣勸不多心自醉強扶衰白拜君嘉

僕所藏仇池石希代之寶也王晉卿以小詩借

觀意在於奪僕不敢不借然以此詩先之

海石來珠宮秀色如蛾綠坡陀尺寸間宛轉陵巒足連

娟二華頂空洞三茅腹初疑仇池化又恐瀛洲感慙慙

嶠南使餽餉淮東牧

僕在揚州程德孺由嶺南解官以此石見遺

得之喜無

寐與汝交不瀆盛以高麗盆藉以文登玉

僕以高麗所鑄大銅盆貯

之又以登州海石如碎玉者附其足

幽光先五夜冷氣壓三伏老人生如

寄衡茅久未卜一夫幸可致千里還相逐風流貴公子

竄謫武當谷見山應已厭何事奪所欲欲留嗟趙弱寧

金匱山房詩集 卷二十一  
許負秦曲傳觀慎勿許問道歸應速

次天字韻答岑巖起

一聲清蹕霧開天  
百辟心莊豈貌虔  
回顧驚君珠玉側  
同升愧我執糠前  
裴回月色留壇影  
縹緲松香泛蠟煙  
近制以椽燭  
松明易執盆莫歎郎潛生白髮  
聖朝求舊鄙鳶肩

石塔寺

并引

世傳王播飯後鐘詩蓋揚州石塔寺事也相傳如此戲作此詩

饑眼眩東西詩腸忘蚤晏雖知燈是火不悟鐘非飯山  
僧異漂母但可供一莞胡為三百年記憶作此訕齋廚  
養若人無益祇遺患乃知飯後鐘闍黎蓋具眼

次韻蔣穎叔二首

扈從景靈宮

道人幽夢曉初還已覺笙簫下月壇風伯前驅清宿霧  
祝融驟乘破朝寒英姿連壁從多士妙句鏘金和八鑾  
已向詞臣得頗牧

時穎叔新除熙河帥

路人莫作老儒看

凝祥池

似知金馬客時夢碧雞坊冰雪消殘臘煙波寫故鄉鳴  
鑾自容與立馬久回翔乞與三韓使新圖到樂浪

時高麗使

在都下每至勝境輒圖畫以歸

和叔盜畫馬次韻

天驥德力備馬外龍麟中皇天不遣言兀與圖畫同駕  
駘飽官粟未受一洗空十駕均一至何事籥雲風

王晉卿示詩欲奪海石錢穆父王仲至蔣頴叔



皆次韻穆至二公以為不可許獨潁叔不然  
今日潁叔見訪親覩此石之妙遂悔前語軾  
以謂晉卿豈可終閉不予者若能以韓幹二  
散馬易之者蓋可許也復次前韻

相如有家山縹緲在眉綠誰云千里遠寄此一顰足平  
生錦繡腸蚤歲藜莧腹從教四壁空未遣兩峰感吾今  
況衰病義不忘樵牧逝將仇池石歸沂岷山瀆守子不  
貪寶完我無瑕玉故人詩相戒妙語予所伏一篇獨異

論三占從兩卜君家畫可數天驥紛相逐風駿掠原野  
電尾梢澗谷君如許相易是亦我所欲今朝安西守來  
聽陽關曲勸我留此峰他日來不速

軾欲以石易畫晉卿難之穆父欲兼取二物頴  
叔欲焚畫碎石乃復次前韻并解二詩之意

春冰無真堅霜葉失故綠鸚疑鵬萬里蛇笑夔一足二  
豪爭攘袂先生一捧腹明鏡既無臺淨餅何用感

古蹴  
感通

盆山不可隱畫馬無由牧聊將置庭宇何必棄溝瀆焚

寶真愛寶碎玉未忘玉久知公子賢出語耆年伏欲觀  
博物妙故以求馬卜維摩既復捨天女還相遂授之無  
盡燈照此久幽谷定心無一物法樂勝五欲三峨吾鄉  
井萬里君部曲卧雲行歸休破賊見神速

晉卿將種  
常有此志

生日蒙劉景文以古畫松鶴為壽且貺嘉篇次  
韻為謝

問予一室間寧有千里廓塵心洗長松遠意發孤鶴生  
朝得此壽死籍疑可落微言在參同妙契藏九籥故人

有奇趣逸想寄幽壑霜枝謝寒暑雲翻無前却何須構  
明堂未羨巢阿閣緬懷別時語復作數日惡詩腴固堪  
餐字瘦還可愕高標忽在眼清夢了如昨君今噲等伍  
志與湛輩各豈待相顧言方為不朽託子雲老執戟長  
孺終主爵吾當追喬松子亦鄙衛霍

程德孺惠海中栢石兼辱佳篇輒復和謝

嵐薰瘴染却敷腴笑飲貪泉獨繼吳未欲連車收薏苡  
肯教沉網取珊瑚不知庾嶺三年別收得曹谿一滴無

但指庭前雙柏石要予臨老識方壺

次秦少游韻贈姚安世

帝城如海欲尋難肯捨漁舟到杏壇  
剝啄扣君容膝戶  
魏我笑我切雲冠問羊獨怪初平在  
牧豕應同德曜看  
肯把參同較同異小窓相對為研丹

次丹元姚先生韻

浮生知幾何僅熟一釜羹那於俯仰間  
用此委曲情自  
憐無他腸偶亦得此生懸知當去客中  
有不亡存但恐

宿緣重每為習氣昏似聞梅子真近在吳市門未能肩  
拍洪但欲目擊溫不敢扣門呼恐作踰垣奔且令紹介  
先徐以方便論不學劉更生黃金鑄尚方不學房次律  
身事問潁陽王烈亦何人叔夜未可量獨見神山開遽  
餐石髓香至道尚聽瑩麗材終蹶張先生喜而笑幅巾  
登我堂苦誓指黃壤要言刻青琅蓬萊在何許弱水空  
相望且當從嵇阮聊復數山王達人友四海曲士守一  
疆慎勿使形謀兒童驚夜光

次韻秦少游王仲至元日立春三首

省事天公厭兩回  
新年春日併相催  
慙慙更下山陰雪  
要與梅花作伴來

己卯嘉辰壽阿同願渠無過亦無功  
明年春日江湖上

回首觚稜一夢中

子由一字同叔元  
曰己卯渠本命也

詞鋒雖作楚騷寒  
德意還同漢詔寬  
好遣秦郎供帖子

盡驅春色入毫端

立春日翰林學士  
供詩帖子

上元侍飲樓上三首呈同列

澹月踈星遠建章仙風吹下御爐香侍臣鵠立通明觀  
一朵紅雲捧玉皇

薄雪初消野未耕賣薪買酒看升平吾君勤儉倡優拙  
自是豐年有笑聲

老病行穿萬馬羣九衢人散月紛紛歸來一點殘燈在  
猶有傳柑遺細君

侍飲樓上則貴戚爭以黃柑  
遺近臣謂之傳柑蓋尚矣

送蔣穎叔帥熙河

并引

穎叔出使臨洮軾與穆父仲至同餞之各賦詩一篇以



今我來思為韻致過歸之意軾得我字

西方猶宿師論將不及我苟無深入計緩帶我亦可承  
明正須君文字粲藻火自薦雖云數留行終不果正坐  
喜論兵臨老付邊瑣新詩出談笑僚友困掀簸我欲歌  
杖杜楊柳方婀娜邊風事首虜所得蓋么麼願為魯連  
書一射聊城竒陰功在不殺結草酌魏顓

再送蔣穎叔帥熙河二首

使君九萬擊鵬鷃肯為陽關一斷魂不用寬心九千里

安西都護國西門

餘刃西屠橫海鯤  
應予詩識是遊魂  
歸來趑別陶弘景  
看挂衣冠神武門

次韻潁叔觀燈

安西老守是禪僧  
到處應然無盡燈  
永夜出遊從萬騎  
諸羌入看擁千層  
便因行樂令投甲  
不用防秋更打冰  
振旅歸來還侍燕  
十分宣勸恐難勝

次韻王晉卿奉詔押高麗燕射

北苑傳呼陞楮郎東夷初識令君香天山自可三箭取  
海國何勞一葦航宣勸不辭金盃側醉歸爭看玉鞭長  
錦囊詩草勤收拾莫遣雞林得夜光

次韻錢穆父王仲至同賞田曹梅花

寒廳不知春獨立耿玉雪閉門愁永夜置酒及明發忽  
驚庭戶曉未受煙雨沒浮光風宛轉照影水方折鬢霜  
未易掃眉斧真自伐惟當此花前醉卧黃昏月

送襄陽從事李友諒歸錢塘

居杭積五歲自意本杭人故山歸無家欲卜西湖隣良  
田不難買靜士誰當親髯張既超然老潛亦絕倫李子  
冰玉姿文行兩清淳歸從三人游便足了此身公堤不  
改作姥嶺行開新幽夢隨子去松花落衣巾

次韻吳傳正枯木歌

天公水墨自奇絕瘦竹枯松寫殘月夢回踈影在東窓  
驚怪霜枝連夜發生成變壞一彈指乃知造物初無物  
古來畫師非俗士妙想實與詩同出龍眠居士本詩人

能使龍池飛霹靂君雖不作丹青手詩眼亦自工識拔  
龍眠胸中有千驕不獨畫肉兼畫骨但當與作少陵詩  
或自與君拈秃筆東南山水相招呼萬象入我摩尼珠  
盡將書畫散朋友獨與長鋏歸來乎

送黃師是赴兩浙憲

世久無此士我晚得王孫寧非叔度家豈出次公門白  
首沈下吏綠衣有公言哀哉吳越人久為江湖吞官自  
倒帑廩飽不及黎元近聞海上港漸出水底村願君五

卷二十一  
袴手招此半菽魂一見刺史天稍忘獄吏尊會稽入吾  
手鏡湖小於盆比我東來時無復瘡痍存

送范中濟經畧侍郎分韻賦詩軾得先字且贈

以魚枕盃四馬箠一

梁李久樂禍自焚豈非天兩鼠鬪穴中一勝亦偶然謀  
初要百慮善後乃萬全廟堂選世將范氏真多賢仁風  
被宿麥綠浪搖秦川號令聳毛羽先聲落虛弦我家天  
一方去路城西偏投竿困障日賣劔行歸田贈君荆魚

孟副以蜀馬鞭一醉可以起毋令祖生先

書晁說之考牧圖後

我昔在田間但知羊與牛  
川平牛背穩如駕百斛舟  
舟行無人岸自移我卧讀書牛不知  
前有百尾羊聽我鞭聲如鼓輦  
我鞭不妄發視其後者而鞭之  
澤中草木長草長病牛羊尋山跨坑  
谷騰趲筋骨強煙蓑雨笠長林下  
老去而今空見畫世間馬耳射東風  
悔不長作多牛翁

翁

呂與叔學士挽詞

言中謀猷行中經關西人物數清英欲過叔度留終日  
未識魯山空此生論議凋零三益友功名分付二難兄  
老來尚有憂時歎此涕無從何處傾

丹元子示詩飄飄然有謫仙風氣吳傳正繼作  
復次其韻

飛仙亦偶然脫命瞬息中惟詩不可擬如寫天日容夢  
中哦七言玉丹已入懷一語遭綽虐失身墮蓬萊蓬萊



至今空護短不養才上界足官府謫仙應退休可憐吳  
與蘇翫醴雪滿頭雪滿頭終當却與丹元子笑指東海  
乘桴浮

次王定國韻書丹元子寧極齋

仙人與吾輩寓迹同一塵何曾五漿餽但有爭席人寧  
極無常居此齋自隨身人那識郗鑒天不留封倫誤落  
世網中俗物愁我神先生忽扣戶夜呼祁孔賓便欲隨  
子去著書未絕麟願挂神武冠往卜飲馬鄰王郎濯紩

綺意與陋巷親南游苦不蚤儻及萼鱸新

王仲至侍郎見惠穉桔種之禮曹北垣下今百  
餘日矣蔚然有生意喜而作詩

翠桔東南美近生神嶽陰惜哉不可致霜根絡雲岑仙風振  
高標香實隕平林偶隨樗櫟生不為樵牧侵忽驚黃茅嶺  
稍出青玉鉞好事雖力取王城少知音豈無換鵝手但知覓  
來禽高懷獨夫子一見捐索金得之喜不寐贈我意殊深公  
堂開後閣凡木愧華簪栽培一寸根寄子百年心常恐樊籠

中推我鸞鶴襟誰知積雨後寒芒曉森森恨我迫歸老不見  
汝十尋蒼皮護玉骨且莫視古今何人風雨夜卧聽饑龍吟

次韻錢穆父馬上寄蔣穎叔二首

玉關不用一丸泥自有長城烏鼠西刺與故人尋土物  
臘糟紅麴寄駝蹄

多買黃封作洗泥使君來自隴山西高才得免人人羨  
爭欲尋踪覓舊蹄

表弟程德孺生日

仗下千官散紫庭時聞小語說蘇程長身自昔傳甥舅

壽骨遂知是弟兄

予與君皆壽骨貫耳班列中多指予二人不問而知其為中表也

曾

活萬人寧望報

君在楚州予在杭州皆遇飢歲活數萬人

祇求五畝却歸耕

四朝遺老凋零盡鶴髮他年幾箇迎

七年九月自廣陵召還復館于浴室東堂八年

六月乞會稽將去汶公乞詩乃復用前韻三首

乞郡三章字半斜廟堂傳笑眼昏花上人問我遲留意

待賜頭綱八餅茶

尚書學士得賜頭綱龍茶一觔八餅今年綱到最遲

夢繞吳山却月廊白梅盧橘覺猶香

杭州梵天寺有月廊數百間寺中多

白楊梅盧橘

會稽且作須臾意從此歸田策最良

東南此去幾時歸倦鳥孤飛豈有期  
斷送一生消底物三年光景六篇詩

吳子野將出家贈以扇山枕屏

我我扇中山絕壁信天剖誰施大圓鏡  
衡霍入戶牖得之老月師畫者一醉叟  
常疑若人胸自有雲夢數千巖在掌握  
用捨彈指久低昂不自知恨寄兒女手  
短屏雖

曲折高枕謝奔走出家非今日法水洗無垢浮游雲釋  
嶠燕坐柳生肘忘懷紫翠間相與到白首

東府雨中別子由

庭下梧桐樹三年三見汝前年適汝陰見汝鳴秋雨去  
年秋雨時我自廣陵歸今年中山去白首歸無期客去  
莫歎息主人亦是客對牀定悠悠夜雨空蕭瑟起折梧  
桐枝贈汝千里行重來知健否莫忘此時情

謝仲適坐上送王敏仲北使

衝風振河朔飛霧失太行相逢不相識下馬須睂黃洗  
眼忽驚笑見此玉節郎喜有賢主人共此殘燭光聚散  
一夢中人北鴈南翔吾生如寄耳送老天一方幸子遇  
明主陳經入西廂歸期不可緩倚相宜在傍

書丹元子所示李太白真

天人幾何同一漚謫仙非謫乃其游麾斥八極隘九州  
化為兩鳥鳴相酬一鳴一止三千秋開元有道為少留  
縻之不可矧肯求西望太白橫峨岷眼高四海空無人

大兒汾陽中令君小兒天台坐忘真生年不知高將軍  
手汗吾足乃敢瞋作詩一笑君應聞

次韻曾仲錫承議食蜜漬生荔枝

代北寒蠶擣韭萍奇苞零落似晨星逢鹽久已成枯腊  
得蜜猶應是薄刑欲就左慈求拄杖便隨李白跨滄溟  
攀條與立新名字兒女稱呼忍不經

俗有十八娘荔枝

大行太皇太后挽詞二首

至矣吾三后功高漢已還復推元祐冠蓋得永昭全

臣嘗



於經筵論奏仁宗皇帝謚曰明孝若明而不仁則民畏而不愛仁而不明則民愛而不畏今大行太皇太后亦兼此二德故天下思慕庶幾於仁宗也

有作猶非聖無私乃是天侍臣談

要道家法信家傳

宰相以下嘗於經筵論奏祖宗以來家法十餘事書於記注

却狄安諸夏先王社稷臣固應祠百世何止活千人定策天知我忘家帝念親萬方何以報得疾為勤民

再和魯仲錫荔支

柳花著水萬浮萍荔實周天兩歲星

柳至易成飛絮落水經宿即為浮

萍荔支至難長二

十四五年乃實本自玉肌非鵲浴至今丹殼似猩刑

侍郎賦詠窮三峽妃子煙塵動四溟莫遣詩人說功過  
且隨香草附騷經

次韻滕大夫三首

雪浪石

太行西來萬馬屯勢與岱嶽爭雄尊飛狐上黨天下脊  
半掩落日先黃昏削成山東二百郡氣壓代北三家村  
千峯石卷蟲牙帳崩崖鑿斷開土門竭來城下作飛石  
一礮驚落天驕魂承平百年烽燧冷此物僵卧枯榆根

畫師爭摹雪浪勢天工不見雷斧痕離堆四面繞江水  
坐無蜀士誰與論老翁兒戲作飛雨把酒坐看珠跳盆  
此身自幻孰非夢故園山水聊心存

同前

我頃三章乞越州欲尋萬壑看交流且憑造物開山骨  
已見天吳出浪頭

石中似有  
海獸形狀

履道鑿池雖可致玉川卷

地若為收洛陽泉石今誰主莫學癡人李與牛

沉香石

壁立孤峰倚硯長共疑沉水得頑蒼欲隨楚客紉蘭佩  
誰信吳兒是木腸山下曾逢化松石玉中還有辟邪香  
早知百和俱灰燼未信人言弱勝強

石芝詩

并引

予昔夢食石芝作詩記之今乃真得石芝於海上子由  
和前詩見寄予頃在京師有鑿井得如小兒手以獻者  
臂指皆具膚理若生子聞之隱者曰此肉芝也與子由  
烹而食之追記其事復次前韻

土中一掌嬰兒新爪指良是肌骨勻見之怖走誰敢食  
天賜我爾不及賓旌陽遠游同一許長史玉斧皆門戶  
我家韋布三百年祇有陰功不知數跪陳八簋加六瑚  
化人視之真塊蘇肉芝烹熟石芝老笑唾熊掌嚙雕胡  
老蠶作蠶何時脫夢想至人空激烈古來大藥不可求  
真契當如磁石鐵

鶴歎

園中有鶴馴可呼我欲呼之立坐隅鶴有難色側睨予

豈欲臆對如鵬乎我生如寄良畸孤三尺長脰閤瘦軀  
俛啄少許便有餘何至以身為子娛驅之上堂立斯須  
投以餅餌視若無戛然長鳴乃下趨難進易退我不如

送曾仲錫通判如京師

邊城歲暮多風雪強壓春醪與君別玉帳夜談霜月苦  
鐵騎曉出冰河裂斷蓬飛葉卷黃沙祇有千林鬢鬆花  
應為王孫朝上國珠幢玉節與排衙左援公孝右孟博  
我居其間嘯且諾僕夫為我催歸來要與北海春水爭

先回

和錢穆父送別并求頓遞酒

次韻

聯鑣接武兩長身  
鵷鷺行中語笑親  
九子羨君門戶壯  
八州憐我往來頻  
佇聞東府開賓閣  
便乞西湖洗塞塵  
更向青齊覓消息  
要知從事是何人

東坡全集卷二十一



欽定四庫全書

東坡全集卷二十二

宋 蘇軾 撰

詩六十九首

劉醜廝詩

劉生望都民病羸寄空窰有子曰醜廝十二行操瓢墻  
間得餘粒雪中拾墮樵饑飽共生死水火同焚漂病翁  
恃一褐度此積雪宵哀哉二暴客掣去如饑鴉翁既死  
於寒客亦易此齟崎嶇走亭長不憚雪徑遙我仇祝與

苑物色同遮邀行路為出涕二客竟就臬譊譊訴我庭  
慷慨驚吾僚曰此可名寄追配柳之莨恨我非柳子擊  
節為爾謠官賜二萬錢無家可歸嬌為媼他日婦婉然  
初垂髻洗沐作小史裹頭束其腰筆硯耕學苑戈矛戰  
天驕壯大隨所好忠孝福可徵相國有折脇封侯或吹  
簫人事豈易料勿輕此僬僥

題毛女真

霧鬢風鬟木葉衣山川良是昔人非祇應門過商顏老

獨自吹簫月下歸

寄餽合刷餅與子由

老人心事日摧頽宿火通紅手自焙小甌短餅良具足  
穉兒嬌女共燔煨寄居東閣閒蒸栗知我空堂坐畫灰  
約束家僮好收拾故山梨棗待翁來

次韻子由清汶老龍珠丹

天公不解防癡龍玉函寶方出龍宮雷霆下索無處避  
逃入先生衣袂中先生不作金椎袖玩世徜徉隱屠酒

夜光明月空自投一鍛何勞緯蕭手黃門寡好心易足  
荊棘不生梨棗熟玄珠白璧兩無求無脛金丹來入腹  
區區分別笑樂天那知空門不是仙

次韻子由書清汶老所傳秦湘二女圖

春風消冰失瑤玉我本無身安有觸羊生得婦如得風  
握手一笑未為辱先生室中無天遊佩環何處鳴風甌  
隨魔未必皆魔女但與分燈遣歸去胡為寫真傳世人  
更要維摩一轉語丹元茅茨祇三間太極老人時往還

點檢凡心早除拂方平神鞭常使物

紫團參寄王定國

谿訝土門口突兀太行頂豈惟團紫雲實自俯倒景剛  
風被草木真氣入茗潁舊聞人銜芝生此羊腸嶺纖纖  
虎豹鬣威縮龍蛇癭蠶頭試小嚼龜息變方騁矧予明  
真子已造浮玉境清宵月挂戶半夜珠落井灰心寧復  
然汗喘久已靜東坡猶故目北藥致遺秉欲持三極根  
往侑九轉鼎為予置齒頰豈不賢酒茗

次韻劉燾撫句蜜漬荔支

時新滿座聞名字別久何人記色香葉似楊梅蒸霧雨  
花如盧橘傲風霜每憐蓴菜下鹽豉肯與蒲萄壓酒漿  
回首驚塵卷飛雪詩情真合與君嘗

立春日小集呈李端叔

白髮已十載青春無一堪不驚新歲換聊與故人談牛  
健民聲喜鴉嬌雪意酣霏微不到地和暖要宜蠶歲月  
斜川似風流曲水慙行吟老燕代坐睡夢江潭丞掾頗

哀援歌呼誰怕參裒懷久灰槁習氣尚饒貪白啖本河  
朔紅消真劍南辛盤得青韭臘酒是黃柑歸卧燈殘帳  
醒聞葉打庵須煩李居士重說後三三

次韻魯仲錫元日見寄

蕭索東風兩鬢華年年幡勝翦宮花愁聞塞曲吹蘆管  
喜見春盤得蓼芽吾國舊供雲澤米

定武齋酒  
用蘇州米

君家新

致雪坑茶

近得魯  
坑茶

燕南異事真堪記三寸黃柑擘永嘉

子由生日以檀香觀音像及新合印香銀篆槃

為壽

梅檀婆律海外芬  
西山老臍柏所薰  
香螺脫鱗來相羣  
能結縹眇風中雲  
一燈如螢起微焚  
何時度盡繆篆紋  
繚繞無窮合復分  
縣縣浮空散氤氲  
東坡持是壽卯君  
君少與我師皇墳  
旁資老聃釋迦文  
共厄中年點蠅蚊  
晚遇斯須何足云  
君方論道承華勛  
我亦旗鼓嚴中軍  
國恩當報敢不勤  
但願不為世所醺  
爾來白髮不可耘  
問君何時返鄉枌  
收拾散亡理放紛  
此心實與香俱君聞



思大士應已聞

次韻李端叔送保倅翟安常赴闕兼寄子由

中山保塞兩窮邊  
卧治雍容已百年  
顧我迂愚分竹使  
與君談笑用蒲鞭  
松荒三徑思元亮  
草合平池憶惠連  
白髮歸心憑說與  
古來誰似兩疏賢

中山松醪寄雄王引進

鬱鬱蒼髯千歲姿  
肯來盃酒作兒嬉  
流芳不待龜巢葉  
唐人以荷葉為酒  
盃謂之碧筒酒  
掃白聊煩鶴踏枝  
醉裏便成歌雪舞

醒時與作嘯風辭馬軍走送非無意玉帳人間合有詩

次韻李端叔謝送牛戩鴛鴦竹石圖

聞君談西戎廢食忘早晚王師本不陳賊壘何足剗守  
邊在得士此語要而簡知君論將口似我識畫眼笑指  
塵壁間此是老牛戩平生師衛玠非意常理遣訴君定  
何人未用市朝顯置之勿復道世俗固多舛歸去亦何  
須單車渡殺澠如蟲得羽化已脫安用蠶家書空萬軸  
涼曝困舒卷念當掃長物閉息默自煖此畫聊付君幽

處得小展新詩勿縱筆  
羣吠驚邑犬時來未可知  
妙斷待輪扁

次韻聰上人見寄

前身本同社宿業獨臨邊  
一悟鏡空老始知  
圓澤賢歸心忘犢  
佩生術寄羊鞭不似歐陽子  
空留六一泉

次韻王雄州還朝留別

老李威名八十年  
壁間精悍見遺顏  
自聞出守風流似  
稍覺承平氣象還  
但遣詩人歌杖杜  
不妨侍女唱陽關

內朝接武知何日白髮羞歸供奉班

三月二十日多葉杏盛開

零露泣月藥溫風散晴葩春工了不睡連夜開此花芳  
心誰翦刻天質自清華惱客香有無弄粧影橫斜中山  
古戰國殺氣浮高牙叢臺餘袿服易水雄悲笳自從此  
花開玉肌洗塵沙坐令游俠窟化作溫柔家我老念江  
海不飲空咨嗟明年花開時舉酒望三巴

蓋欲請梓  
州而歸也

三月二十日開園三首

雪髯霜鬢語僞惺澹蕩園林取次行要識將軍不凡意

從來祇啜小人羹

是日散父  
老酒食

西園牡籥夜沉沉尚有游人卧柳陰鶴睡覺時風露下  
落花飛絮滿衣襟

鬱鬱蒼髯真道友絲絲紅萼是鄉人

蒼髯松也  
紅萼海棠

何時翠

竹江村路送我柴門月色新

次韻王雄州送侍其涇州

威聲又數中興年二虜行當一矢聯聞道名城得真將

故應驚羽落空弦追鋒歸去雄三衛授鉞重來定十連  
別酒回頭便陳迹號呶端合發初筵

臨城道中作

并引

予初赴中山連日風埃未嘗了了見太行也今將適嶺  
表頗以是為恨過臨城內丘天氣忽清徹西望太行草  
木可數岡巒北走崖谷秀傑忽悟歎曰吾南遷其速返  
乎退之衡山之祥也書以付邁使志之

逐客何人著眼看太行千里送征鞍未應愚谷能留柳

可獨衡山解識韓

過湯陰市得豌豆大麥粥示三兒子

朔野方赤地河壩但黃塵秋霖暗豆漆夏旱臞麥人逆  
旅唱晨粥行庖得時珍青班照匕筯脆響鳴牙齦玉食  
謝故吏風餐便逐臣漂零竟何適浩蕩寄此身爭勸加  
餐食實無負吏民何當萬里客歸及三年新

子由新修汝州龍興寺吳畫壁

丹青久衰工不執人物尤難到今世每摹市井作公卿

畫手懸知是徒隸吳生已與不傳死那復典刑留近歲  
人間幾處變西方盡作波濤翻海勢細觀手面分轉側  
妙算毫釐得天契始知真放本精微不比狂花生客慧  
似聞遺墨留汝海古壁蝸涎可垂涕力捐金帛扶棟宇  
錯落浮雲卷新霽使君坐歎清夢餘幾疊衣紋數襟袂  
他年弔古知有人姓名聊記東坡弟

過高郵寄孫君孚

過淮風氣清一洗塵埃容水木漸幽茂菰蒲雜游龍可



憐夜合花青枝散紅茸美人游不歸一笑當誰供故園  
在何處已偃手種松我行忽失路歸夢山千重聞君有  
負郭二頃收橫從卷野畢秋穫殷牀聞夜春樂哉何所  
憂社酒粥面釀宦游豈不好毋令到千鍾

僕所至未嘗出遊過長蘆聞復禪師病甚不可  
不一問既見則有間矣明日阻風復留見之  
作三絕句呈聞復并請轉呈參寥子各賦數  
首

亦知壺子不死敢問老聃所游瑟瑟寒松露骨耽耽病  
虎垂頭

莫言西蜀萬里且到南華一游扶病江邊送客杖屨浦  
口回頭

老去此生一訣興來明日重游卧聞三老白事半夜南  
風打頭

六月七日泊金陵阻風得鍾山泉公書寄詩為  
謝

今日江頭天色惡，駁車雲起風欲作。  
獨望鍾山喚寶公，林間白塔如孤鶴。  
寶公骨冷喚不聞，却有老泉來喚人。  
電眸虎齒霹靂舌，為予吹散千峰雲。  
南行萬里亦何事，一酌曹谿知水味。  
他年若畫蔣山圖，為作泉公喚居士。

贈清涼寺和長老

代北初辭沒馬塵，江南來見卧雲人。  
問禪不契前三語，施佛空留丈六身。  
老去山林徒夢想，雨餘鐘鼓更清新。  
會須一洗黃茅瘴，未用深藏白氎巾。

予前後守倅餘杭凡五年夏秋之間蒸熱不可  
過獨中和堂東南頗下瞰海門洞視萬里三  
伏常蕭然也紹聖元年六月舟行赴嶺外熱  
甚忽憶此處而作是詩

忠孝王家千柱宮東坡作吏五年中中和堂上東南頗  
獨有人間萬里風

慈湖夾阻風五首

捍索桅竿立嘯空驚師酣寢浪花中故應管蒯知心腹

弱纜能爭萬里風

此生歸路愈茫然  
無數青山水拍天  
猶有小船來賣餅  
喜聞墟落在山前

我行都是退之詩  
真有人家水半扉  
千頃桑麻在船底  
空餘石髮挂魚衣

月輪亭午汗珠融  
誰識南訛長養功  
暴雨過雲聊一快  
未妨明月却當空

卧看落月橫千丈  
起喚清風得半帆  
且並水村歌側過

人間何處不巉巖

過廬山下

并引

予過廬山下雲物騰涌默有禱焉未午衆峰凜然故作是詩

亂雲欲霾山勢與飄風南羣嶺相應和勇往爭驂驪可憐蒼蔚中時出紫翠嵐鴈沒失東嶺龍騰見西龕一時供坐笑百態變立談暴雨破塊北清飈掃渾酣廓然歸何處陋矣安足戡亭亭紫霄峰窈窕白石庵五老數松

雪雙谿落天潭雖云默禱應願有移文慙

江西

江西山水真吾邦白沙翠竹石底江舟行十里磨九瀧  
篙聲曄曄相舂撞醉卧欲醒聞淙淙真欲一口吸老龐  
何人得儁窺魚缸舉叉絕叫尺鯉雙

秧馬歌

并引

過廬陵見宣德郎致仕曾君安止出所作禾譜文既溫  
雅事亦詳實惜其有所缺不譜農器也予昔游武昌見

農夫皆騎秧馬以榆棗為腹欲其滑以楸桐為背欲其輕腹如小舟昂其首尾背如覆瓦以便兩髀雀躍于泥中繫束藁其首以縛秧日行千畦較之偃僂而作者勞佚相絕矣史記禹乘四載泥行乘橈解者曰橈形如箕擿行泥上豈秧馬之類乎作秧馬歌一首附于禾譜之末云

春雲濛濛雨淒淒春秧欲老翠剡齊嗟我婦子行水泥朝分一壠暮千畦腰如瑩篴首啄雞筋煩骨殆聲酸嘶



我有桐馬手自提頭尻軒昂腹脇低背如覆瓦去角圭  
以我兩足為四蹄聳踊滑汰如鳬驚纖纖束縈亦可齎  
何用繁纓與月題竭從畦東走畦西山城欲閉聞鼓鼙  
忽作的盧躍檀溪歸來挂壁從高栖了無芻秣饑不啼  
少壯騎汝逮老黧何曾蹶軼防顛擠錦韉公子朝金閨  
笑我一生蹋牛犁不知自有木馱馱

八月七月初入贛過惶恐灘

七千里外二毛人十八灘頭一葉身山憶喜歡勞遠夢

蜀道有錯喜歡鋪在大散關上地名惶恐泣孤臣長風送客添帆腹積

雨扶舟減石鱗便合與官充水手此生何止畧知津

鬱孤臺

以下四首皆虔州

八境見圖畫鬱孤如舊游山為翠浪涌水作玉虹流日  
麗崆峒曉風酣章貢秋丹青未變葉鱗甲欲生洲嵐氣  
昏城樹灘聲入市樓煙雲侵嶺路草木半炎州故國千  
峰外高臺十日留他年三宿處準擬繫歸舟

廉泉

水性故自清不清或撓之君看此廉泉五色爛摩尼廉  
者為我廉我以此名為有廉則有貪有慧則有癡誰為  
柳宗元孰是吳隱之漁父足豈潔許由耳何湍紛然立  
名字此水了不知毀譽有時盡不知無盡時竭來廉泉  
上捋鬚看鬢眉好在水中人到處相娛嬉

塵外亭

楚山澹無塵贛水清可厲散策塵外游麾手謝此世山  
高惜人力十步輒一憩却立浮雲端俯視萬井麗幽人

宴坐處龍虎為斬難馬駒獨何疑豈墮山鬼計夜垣非  
助我謬敬欲其逝戲留一轉語千載起攘袂

天竺寺

并引

予年十二先君自虔州歸為予言近城山中天竺寺有  
樂天親書詩云一山門作兩山門兩寺元從一寺分東  
澗水流西澗水南山雲起北山雲前臺花發後臺見上  
界鐘清下界聞遙想吾師行道處天香桂子落紛紛筆  
勢奇逸墨迹如新今四十七年矣予來訪之則詩已亡

有刻石存耳感涕不已而作是詩

香山居士留遺迹天竺禪師有故家  
空詠連珠吟疊壁已亡飛鳥失驚蛇  
林深野桂寒無子雨浥山薑病有花  
四十七年真一夢天涯流落涕橫斜

過大庾嶺

一念失垢汙身心洞清淨浩然天地間  
惟我獨也正今日嶺上行身世永相忘  
仙人拊我頂結髮授長生

宿建封寺曉登盡善亭望韶石三首

雙闕浮空照短亭至今猿鳥獻青瑩君王自此西巡狩  
再使魚龍舞洞庭

蜀人文賦楚人辭堯在崇山舜九疑聖主若非真得道  
南來萬里亦何為

嶺海東南月窟西功成天已錫玄圭此方定是神仙宅  
禹亦東來隱會稽

月華寺

寺隣岑水場施者皆坑  
戶也百年間蓋三焚矣

天公胡為不自憐結土融石為銅山萬人探斲富媼泣

祇有金帛資豪奸脫身獻佛意可料一瓦坐待千金還  
月華三火豈天意至今爰舍依榛管僧言此地本龍象  
興廢反掌曾何艱高巖夜吐金碧氣曉得異石青爛斑  
坑流窟發錢涌地莫施百鎰朝千鏹此山出寶以自賤  
地脈已斷天應慳我願銅山化南畝爛漫黍麥蘇惛鯨  
道人修道要底物破鑪煮飯茹三間

南華寺

云何見祖師要識本來面亭亭塔中人問我何所見可

憐明上座萬法了一電飲水既自知指月無復眩我本  
修行人三世積精練中間一念失受此百年譴摠衣禮  
真相感動淚雨霰借師錫端泉洗我綺語硯

碧落洞

在英州下  
十五里

槎牙亂峰合晃蕩絕壁橫遙知紫翠間古來仙釋并陽  
崖射朝日高處連玉京陰谷扣白月夢中游化城果然  
石門開中有銀河傾幽龕入窈窕別戶穿虛明泉流下  
珠琲乳蓋交纓纓我行畏人知恐為仙者迎小語輒響



苔空山自雷驚策杖歸去來治具煩方平

峽山寺

傳奇所記孫恪表氏事即此寺至今有人見白猿者

天開清遠峽地轉凝碧灣我行無遲速攝衣步孱顏山僧本幽獨乞食況未還雲碓水自舂松門風為關石泉解娛客琴筑鳴空山佳人劒翁孫游戲暫人間忽憶嘯雲侶賦詩留玉環林空不可見霧雨霾髻鬟

舟行至清遠縣見顧秀才極談惠州風物之美到處聚觀香案吏此邦宜着玉堂仙江雲漠漠桂花濕

海雨脩脩荔子然聞道黃柑常抵鵲不容朱橘更論錢  
恰從神武來弘景便向羅浮覓稚川

廣州蒲澗寺

地產菖蒲十二節相傳安期  
生之故居始皇訪之於此

不用山僧導我前自尋雲外出山泉千章古木臨無地  
百尺飛濤瀉漏天舊日菖蒲方士宅後來薜蘿祖師禪

而今祇有花含笑笑道秦皇欲學仙

山中多  
含笑花

贈蒲澗信長老

優鉢曇花豈有花問師此曲唱誰家已從子美得桃竹

此山有菴竹可作杖而土人不識予始錄子美詩遺之

不向安期覓棗瓜燕坐林

間時有虎高眠粥後不聞鴉勝游自古兼支許為採松

肪寄一車

### 發廣州

朝市日已遠此身良自如三杯軟飽後

浙人謂飲酒為軟飽

一枕

黑甜餘

俗謂睡為黑甜

蒲澗踈鐘外黃灣落木初天涯未覺遠

處處各樵漁

浴日亭

在南海廟前

劍氣崢嶸夜插天  
瑞光明滅到黃灣  
坐看暘谷浮金暈  
遙想錢塘涌雪山  
已覺滄涼蘇病骨  
更煩沆瀣洗衰顏  
忽驚鳥動行人起  
飛上千峰紫翠間

游羅浮山一首示兒子過

人間有此白玉京  
羅浮見日難一鳴  
南樓未必齊日觀

鬱儀自欲朝朱明

劉夢得有詩記羅浮夜半見日事山不甚高而夜見日此可異也山有二

石樓今延祥寺在南樓下朱明洞在沖虛觀後云是蓬萊第七洞天

東坡之師抱朴老真

契蚤已交前生玉堂金馬久流落寸田尺宅今歸耕道

華亦嘗啖一棗

唐永樂道士侯道華竊食鄧天師藥仙去永樂有無核棗人不可得道華獨得

之予在岐下亦嘗得食一枚

契虛正欲仇三彭

唐僧契虛遇人導游稚川仙府真人問曰

汝絕三彭之仇乎契虛不能答

鐵橋石柱連空橫

山有鐵橋石柱人罕至者杖藜欲

趵飛猱輕雲谿夜逢瘖虎伏

山有瘖虎巡山

斗壇畫出銅龍獰

沖虛觀後有朱真人朝斗壇近於壇下獲銅龍六銅魚一

小兒少年有奇志中宵起

生存黃庭近者戲作凌雲賦筆勢髣髴離騷經負書從

我盍歸去羣仙正草新宮銘汝應奴隸蔡少霞我亦季

孟山玄卿

唐有夢書新宮銘者云紫陽真人山玄卿撰其畧曰良常西麓原澤東泄新宮宏宏崇軒

轍轍又有蔡少霞者夢人遺書碑畧曰公昔乘魚車今履  
瑞雲躅空仰塗綺輅輪因其未題云五雲書閣吏蔡少  
霞還須略報老同叔羸糧萬里尋初平

子由一字同叔

十月二日初到惠州

髣髴曾游豈夢中欣然雞犬識新豐吏民驚怪坐何事  
父老相携迎此翁蘇武豈知還漠北管寧自欲老遼東

嶺南萬戶皆春色

嶺南萬戶酒

會有幽人客寓公

寓居合江樓

海上葱朧氣佳哉二江合處朱樓開蓬萊方丈應不遠

肯為蘇子浮江來江風初涼睡正美樓上啼鴉呼我起  
我今身世兩相違西流白日東流水樓中老人日清新  
天上豈有癡仙人三山咫尺不歸去一盃付與羅浮春

予家釀酒  
名羅浮春

白水山佛迹巖

羅浮之東麓也在  
惠州東北二十里

何人守蓬萊夜半失左股浮山若鵬蹲忽展垂天羽根  
株互連絡崖嶠爭吞吐神工自爐鞴融液相綴補至今  
餘隙罅流出千斛乳方其欲合時天匠麾月斧帝觴分

餘瀝山骨醉后土峯巒尚開闔澗谷猶呼舞海風吹未  
凝古佛來布武當時汪罔氏投足不蓋拇青蓮雖不見  
千古落花雨雙谿匯九折萬馬騰一鼓奔雷濺玉雪潭  
洞開水府潛鱗有饑蛟掉尾取渴虎我來方醉後濯足  
聊戲侮回風卷飛電掠面過強弩山靈莫惡劇微命安  
足睹此山吾欲老慎勿厭求取谿流變春酒與我相賓  
主當連青竹竿下灌黃精圃

詠湯泉

在白  
水山



積火焚大槐蓄油災武庫驚然丞相井疑浣將軍布自  
憐耳目隘未測陰陽故鬱攸火山烈威沸湯泉注豈惟  
渴獸駭坐使癡兒怖安能長魚鼈僅可燭狐兔山中惟木  
客戶外時芒屨雖無傾城浴幸免亡國汙

自笑

子石如琢玉遠煙真削鱗入我病風手

古語云磨墨如病風手

玄

雲滄淒淒是中有何好而我喜欲迷既似蠟屐阮又如  
鍛柳嵇醉筆得天全宛宛天投霓多謝中書君伴我此

幽栖

朝雲詩

并引

世謂樂天有粥駱馬放楊柳枝詞嘉其主老病不忍去也然夢得有詩云春盡絮飛留不得隨風好去落誰家樂天亦云病與樂天相伴住春隨樊子一時歸則是樊素竟去也予家有數妾四五年相繼辭去獨朝雲者隨予南遷因讀樂天集戲作此詩朝雲姓王氏錢塘人嘗有子曰幹兒未暮而天云

不似楊枝別樂天恰如通德伴伶玄阿奴絡秀不同老  
天女維摩總解禪經卷藥爐新活計舞衫歌扇舊因  
緣丹成逐我三山去不作巫陽雲雨仙

寄虎兒

獨倚桺榔樹閒挑草撥根謀生看拙否送老此蠻村

十一月二十六日松風亭下梅花盛開

春風嶺上淮南村昔年梅花曾斷魂

予昔赴黃州春風嶺上見梅花有雨

絕句明年正月往岐亭道中賦詩云  
去年今日關山路細雨梅花正斷魂  
豈知流落復相見

蠻風颭雨愁黃昏長條半落荔支浦卧樹獨秀枕榔園  
豈惟幽光留夜色直恐冷艷排冬溫松風亭下荊棘裏  
兩株玉蕊明朝暎海南仙雲嬌墮砌月下縞衣來扣門  
酒醒夢覺起繞樹妙意有在終無言先生獨飲勿歎息  
幸有落月窺清樽

再用前韻

羅浮山下梅花村玉雪為骨冰為魂紛紛初疑月挂樹  
耿耿獨與參橫昏先生索居江海上悄如病鶴栖荒園

天香國艷肯相顧知我酒熟詩清溫蓬萊宮中花鳥使  
綠衣倒挂扶桑暎抱叢窺我方醉卧故遣啄木先敲門  
麻姑過君急灑掃鳥能歌舞花能言酒醒人散山寂寂  
惟有落盞粘空樽

嶺南珍禽有倒挂子綠毛紅喙如鸚鵡而小自海東來非塵埃間物也

### 新釀桂酒

擣香篩辣入餅盆盞盞春谿帶雨渾收拾小山藏社甕  
招呼明月到芳樽酒材已遣門生致菜把仍叨地主恩  
爛煮葵羹斟桂醕風流可惜在蠻村

惠守詹君見和復次韻

已破誰能惜甑盆  
頽然醉裏得全渾  
欲求公瑾一困米  
試滿莊生五石樽  
三盃卯困忘家事  
萬戶春濃感國恩  
刺史不須邀半道  
藍輿未暇走山村

花落復次前韻

玉妃謫墮煙雨村  
先生作詩與招魂  
人間草木非我對  
奔月偶挂成幽昏  
閣香入戶尋短夢  
青子綴枝留小園  
披衣連夜喚客飲  
雪膚滿地聊相溫  
松明照坐愁不睡

井花入腹清而曠先生年來六十化道眼已入不二門  
多情好事餘習氣惜花未忍終無言留連一物吾過矣  
笑領百罰空壘樽

東坡全集卷二十二



欽定四庫全書

東坡全集卷二十三

宋 蘇軾 撰

詩六十七首

江郊

并引

惠州歸善縣治之北數百步抵江少西有盤石小潭可  
以垂釣作江郊詩云

江郊葱曠雲水清  
綯碕岸斗入洄潭  
輪轉先生悅之布  
席閒燕初日下  
照潛鱗俯見意  
釣忘魚樂此竿  
綫優哉

悠哉玩物之變

詹守攜酒見過用前韻作詩聊復和之

箕踞狂歌老瓦盆  
燎毛燔肉似羌渾  
傳呼草市來攜客  
洒掃漁磯共置樽  
山下黃童爭看舞  
江干白骨已銜恩

時詹方議

樊暴骨孤雲落日西南望  
長羨歸鴉自識村

寄鄧道士

并引

羅浮山有野人相傳葛稚川之隸也  
鄧道士守安山中  
有道者也嘗於庵前見其足迹長二尺許  
紹聖二年正

月十日予偶讀韋蘇州寄金椒山中道士詩云今朝郡  
齋冷忽念山中客澗底束荆薪歸來煮白石遙持一樽  
酒遠慰風雨夕落葉滿空山何處尋行迹乃以酒一壺  
仍依蘇州韻作詩寄之云

一盃羅浮春遠餉採薇客遙知獨酌罷醉卧松下石幽  
人不可見清嘯聞月夕聊戲庵中人空飛本無迹

上元夜

前年侍玉輦端門萬枝燈壁月挂杲愚珠星綴觚稜去

年中山府老病亦宵興牙旗穿夜市鐵馬響春冰今年  
江海上雲房寄山僧亦復舉膏火松間見層層散策枕  
榔林林疎月鬚髻使君置酒罷簫鼓轉松陵狂生來索  
酒

賈道人

一舉輒數升浩歌出門去我亦歸曹騰

正月二十四日與兒子過賴仙芝玉原秀才僧  
曇穎行全道士何宗一同游羅浮道院及栖  
禪精舍過作詩和其韻寄邁迨

斷橋隔勝踐脫屣欣小憩瘴花已繁紅官柳猶疎細斜

川二三子悼歎吾年逝淒涼羅浮館風壁頽雨砌黃冠  
常苦饑迎客羞破袂仙山在何許歸鶴時墮毛崎嶇拾  
松黃欲救齒髮弊坐令禪客笑一夢等千歲栖禪晚置  
酒蠻果粢蕉荔齋厨釜無羹野餉籃有蕙嬉遊趣時節  
俯仰了此世猶當洗業障更作臨水楔寄書陽羨兒并  
語長頭弟門戶各努力先期畢租稅

正月二十六日偶與數客野步嘉祐僧舍東南  
野人家雜花盛開扣門求觀主人林氏媪出

應白髮青裙少寡獨居三十年矣感歎之餘

作詩記之

縹緗細枝出絳房綠陰青子送春忙  
涓涓泣露紫含笑焰焰燒空紅佛桑  
落日孤煙知客恨短籬破屋為誰香  
主人白髮青裙袂子美詩中黃四娘

龍尾石硯寄猶子遠

皎皎穿雲月青青出水荷文章工點黠忠義老研磨偉  
節何須怒寬饒要少和吾衰此無用寄與小東坡

遠為人類

予

贈王子直秀才

萬里雲山一破裘，杖端閒挂百錢游。  
五車書已留兒讀，二頃田應為鶴謀。  
水底笙歌蛙两部，山中奴婢橘千頭。  
幅巾我欲相隨去，海上何人識故侯。

次韻表兄程正輔江行見桃花

曲士賦懷沙，草木傷莽莽。德人無荆棘，坐失巔嶠阻。  
我兄瑚璉姿，流落瘴江浦。淨眼見桃花，紛紛墮紅雨。  
蕭然

振衣被笑問散花女我觀解語花粉色如黃土一言破  
千偈況爾初不語可憐一轉話他日如何舉故復此微  
吟聊和鷗鴉櫓江邊閒草木閒客當為主爾來子美瘦  
正坐作詩苦袖手焚筆硯清篇真漫與願兄理北轅六  
轡去如組上林桃花開水暖鴻北翥

追餞正輔表兄至博羅賦詩為別

孤臣南游墮黃管君亦何事來牧蠻  
艤舟蜚戶龍岡窟置酒柳葉桺擲問高談已笑衰  
語陋傑句尤覺清詩孱



博羅小縣僧舍古我不忍去君忘還君應回望秦與楚  
夢涉漢水愁秦關我亦坐念高安客神游黃蘗叅洞山  
何時曠蕩洗瑕謫與君歸駕相追攀梨花寒食隔江路  
兩山遙對雙烟鬟歸耕不用一錢物惟要兩腳飛屨顏  
玉牀丹鏃記分我助我金鼎光爛斑

再用前韻賦

樂天霜鬢如霜管始知謝遣素與蠻我兄綠髮蔚如故  
已了夢幻齊人間蛾眉勸酒聊爾耳處仲太忍茂弘屨

三盃徑醉便歸卧海上知復幾往還連娟六么赴蹋鞠  
杳眇三疊繫陽關酒醒夢斷何所有落花流水空青山  
忽驚鏡鼓發半夜明月不許幽人攀贈行無物惟一語  
莫遣瘴霧侵雲鬟羅浮道人一傾蓋欲繫白日留君顏  
應知我是香案吏他年許綴蓬萊班

真一酒

并引

米麥水三一而已此東坡先生真一酒也

撥雪披雲得乳泓蜜蠶又欲醉先生

真一色味頗類予  
在黃州日所醞蜜

酒也稻垂麥仰陰陽足器潔泉新表裏清曉日看顏紅有  
暈春風入髓散無聲人間真一東坡老與作青州從事  
名

游博羅香積寺

并引

寺去縣七里三山大牙夾道皆美田麥禾甚茂寺下谿  
水可作碓磨若築塘百步開而落之可轉兩輪舉四杵  
也以屬縣令林抃使督成之

二年流落鼃魚鄉朝來喜見麥吐芒東風搖波舞淨綠

初日沍露醅嬌黃汪汪春泥已沒膝剡剡秋穀初分秧  
誰言萬里出無友見此二美喜欲狂三山屏擁僧舍小  
一谿雷轉松陰涼要令水力供磴磨與相地脉增隄防  
霏霏落雪看收麪隱隱疊鼓聞舂糠散流一啜雲子白  
炊裂十字瓊肌香豈惟牢九薦古味

東晉餅賦云浸頭薄持起搜牢九

要使真一流仙漿詩成捧腹便絕倒書生說食真膏肓

次韻定慧欽長老見寄八首

并引

蘇州定慧長老守欽使其徒卓契順來惠州問予安否

且寄擬寒山十頌語有璨忍之通而詩無島可之寒吾  
甚嘉之為和八首

左角看破楚南柯聞長滕鈎簾歸乳燕穴紙出癡蠅為  
鼠常留飯憐蛾不點燈崎嶇真可笑我是小乘僧

鐵橋本無柱石樓豈有門舞空五色羽吠雲千歲根松  
花釀仙酒未客餽山殮我醉君且去陶云吾亦云

羅浮高萬仞下看扶桑卑默坐朱明洞玉池自生肥從  
來性坦率醉語漏天機相逢莫相問我不記吾誰

幽人白骨觀大士甘露滅根塵各清淨心境兩奇絕真  
源未純熟習氣餘陋劣譬如已放鷹中夜時掣紲

誰言窮巷士乃竊造物權所見皆我有安居受其全戲  
作一篇書千古發爭端儒墨起相殺予初本無言

閒居蓄百毒救彼跛與盲依山作陶穴掩此暴骨橫區  
區効一溉豈能濟含生力惡不已出時哉非汝爭

少壯欲及物老閒餘此心微生山海間坐受瘴霧侵可  
憐鄧道士攝衣問呻吟覆舟却私渡斷橋費千金

淨名毘耶中妙喜恒沙外初無往來相二王同一在云  
何定慧師尚欠行腳債請判維摩憑一到東坡界

二月十九日攜白酒鱸魚過詹使君食槐葉冷

淘

枇杷已熟粲金珠桑落初嘗灑玉蛆暫借垂蓮十分殘  
一澆空腹五車書青浮卵盃槐芽餅紅點冰槃藿葉魚  
醉飽高眠真事業此生有味在三餘

江漲用過韻

草木生故墟牛羊滿空瀆春江圍草市夜浪浮竹屋已  
連漲海白尚帶霍山綠坎離更休王魚鼈橫陵陸得非  
崑崙因欲報陸渾劔行看北風競來救南國蹙長驅連  
山燒一掃含沙毒孤吟愍造化何時停倚伏當憐水旱  
氓不作舟車蓄江流儻席卷社酒期節縮

連雨江漲二首

越井岡頭雲出山牂牁江上水如天牀牀避漏幽人屋  
浦浦移家艇子船龍卷魚鰕并雨落人隨雞犬上墻眠



祇應樓下平階水長記先生過嶺年

急雨蕭蕭作晚涼卧聞榕葉響長廊微明燈火耿殘夢  
半濕簾帷浥舊香高浪隱牀吹甕盎閨風驚樹擺琳琅  
先生不出晴無用留向空階滴夜長

四月十一日初食荔支

南村諸楊北村盧

謂楊梅  
盧橘也

白花青葉冬不枯垂黃綴紫

煙雨裏特與荔支為先驅海山仙人絳羅襦紅紗中單  
白玉膚不須更待妃子笑風骨自是傾城姝不知天公

有意無遣此尤物生海隅雲山得伴松檜老霜雪自困  
檀梨龕先生洗琰酌桂醕永漿薦此蘋虬珠似聞江鱈  
斫玉柱更洗河豚烹腹腴予嘗謂荔枝厚味高格兩絕  
果中無比惟江鱈柱河豚魚  
近之我生涉世本為口一官久已輕尊鱸人間何者非  
夢幻南來萬里真良圖

枕榔杖寄張文潛一首時初聞黃魯直遷黔南  
范淳父九疑也

睡起風清酒在亡身隨殘夢雨茫茫江邊曳杖枕榔瘦

林下尋苗蕈撥香獨步儻逢勾漏令遠來莫恨曲江張  
遙知魯國真男子獨憶平生盛孝章

荅周循州

蔬飯藜牀破衲衣掃除習氣不吟詩前生似是盧行者  
後學過呼韓退之未敢叩門求夜話時叨送米續晨炊  
知君清俸難多輟且寬黃精與療饑

次韻程正輔游碧落洞

空山不難到絕境未易名何時謫仙人來作鈞天聲胸

中幾雲夢餘地方恢宏長庚與北斗錯落綴冠纓黃公  
獻紫芝赤松餽青精谿山久寂寞請續離騷經抱枝寒  
蛭咽繞耳飛蚊清謫仙拊掌笑笑此羽皇銘我頃嘗獨  
游自適孤雲情君今又繼往霧雨愁青冥感君兄弟意  
尋羊問初平玉牀分箭鏃不忍獨長生詩成輒寄我妙  
絕陶謝并孤鴻方避弋老驥猶在垆鳥獸如可羣永寄  
槁木形何山不堪隱飲水自修齡

六月十二日酒醒步月理髮而寢

羽蟲見月爭翻飛我亦散髮虛明軒  
千梳冷快肌骨醒  
風露氣入霜蓬根起舞三人漫相屬  
停盃一問終無言  
曲肱薤簟有佳處夢覺瓊樓空斷魂

荔支歎

十里一置飛塵灰五里一候兵火催  
顛坑仆谷相枕藉  
知是荔支龍眼來飛車跨山鵲橫  
海風枝露葉如新採  
宮中美人一破顏驚塵濺血流千載  
永元荔支來交州  
天寶歲貢取之涪至今欲食林甫肉  
無人舉觴酌伯游

漢永元中交州進荔枝龍眼十里一置五里一候奔馳  
死亡罹猛獸毒蟲之害者無數唐羗字伯翥為臨武長  
上書言狀和帝罷之唐天寶中蓋  
取涪州荔枝自子午谷路進入  
我願天公憐赤子莫

生尤物為瘡痍君不見武夷谿邊粟粒芽前丁後蔡相

籠加爭新買寵各出意今年鬪品充官茶吾君所乏豈

此物致養口體何陋耶洛陽相君忠孝家可憐亦進姚

黃花

洛陽貢花自錢惟演始大小龍茶始於丁晉公成  
於蔡君謨歐陽永叔聞君謨進小龍團驚歎曰君

謨士人也何至作此事今年

閩中監司乞進鬪茶許之

江月五首

并引

嶺南氣候不常吾嘗云菊花開時乃重陽涼天佳月即  
中秋不須以日月為斷也今歲九月殘暑方退既望之  
後月出愈遲然予嘗夜起登合江樓或與客遊豐湖入  
栖禪寺叩羅浮道院登逍遙堂逮曉乃歸杜子美云四  
更山吐月殘夜水明樓此殆古今絕唱也因其句作五  
首仍以殘夜水明樓為韻

一更山吐月玉塔卧微瀾正似西湖上涌金門外看冰  
輪橫海闊香霧入樓寒停鞭且莫上照我一盃殘

二更山吐月幽人方獨夜可憐人與月夜夜江樓下風  
枝夕未停露草不可藉歸來掩闥卧唧唧蟲夜話

三更山吐月栖鳥亦驚起起尋夢中將清絕正如此驅  
雲掃衆宿俯仰迷空水幸可飲我牛不須違洗耳

四更山吐月皎皎為誰明幽人赴我約坐待玉繩橫野  
橋多斷板山寺有微行今夕定何夕夢中將化城

五更山吐月窓通室幽幽玉鉤還挂戶江練却明樓星  
河澹欲曉鼓角冷知秋不眠翻五詠清切變蠻謳



聞正輔表兄將至以詩迎之

生逢堯舜仁得作嶺海游雖懷楚然喜豈免跼墮憂暮  
雨侵重腿曉烟騰鬱攸朝繁見密啣夜枕聞鷓鴣幾欲  
烹鬱屈固嘗饌鈎輈舌音漸獠變面汗嘗駢羞賴我存  
黃庭有時仍丹丘目聽不任耳踵息殆廢喉稍欣素月  
夜遂度黃茆秋我兄清廟器持節瘴海頭蕭然三家步  
橫此萬斛舟人言得漢吏天遣活楚囚惠然再過我樂  
哉十日留但恨參語賢忽潛九原幽萬里儻同歸兩鰥

當對纓

載喪婦已三年矣正輔近亦有亡嫂之戚故云

強歌非真達何必師莊

周

正輔既見和復次前韻慰鼓盆勸學佛

稚川真長生少從鄭公游孝章偶不死免為丈舉憂餘  
齡會有適獨往豈相攸由來警露鶴不羨撮蚤鷗願加  
視後鞭同駕躅空輶寧殮墮齒董勿憶齊眉羞何時遂  
縱壑歸路同首丘東岡松柏老西嶺橘柚秋著意尋彌  
明長頸高結喉無心逐定遠燕頤飛虎頭君方卒功名

一泛范蠡舟我亦霑沛渥漸解鍾儀囚寧須張子房萬  
戶自擇留猶勝嵇叔夜孤憤甘長幽南牕可寄傲北山  
早歸耰此語君勿疑老彭跨商周

同正輔表兄游白水山

偉哉造物真豪縱攫土搏沙為此弄擘開翠峽走雲雷  
截破奔流作潭洞因隨化人履巨迹得與仙兄躡飛鞚  
曳杖不知巖谷深穿雲但覺衣裘重坐看驚鳥投霜葉  
知有老蛟蟠石甕金沙玉礫粲可數古鏡寶奩寒不動

念兄獨立與世疎絕境難到惟我共永辭角上兩蠻觸  
一洗胸中九雲夢浮來山高回望失武陵路絕無人送  
筠籃擷翠爪甲香素綆分碧銀餅凍歸路霏霏湯谷暗  
野堂活活神泉涌解衣浴此無垢人身輕可試雲間鳳

與正輔游香積寺

越山少松竹常苦野火厄此峯獨蒼然感荷佛祖力  
茯苓無人採千歲化琥珀幽光發中夜見者惟木客我豈  
無長鑱真贗苦難識靈苗與毒草疑似在毫髮把玩竟

不食棄置長太息山僧類有道辛苦常谷汲我慙作機  
舂鑿破混沌穴幽尋恐不繼書板記歲月

次韻正輔同游白水山

祇知楚越為天涯不知肝膽非一家此身如綫自縈繞  
左旋右轉隨繅車誤拋山林入朝市平地咫尺千褒斜  
欲從樛川隱羅浮先與靈運開永嘉首參虞舜歎韶石  
次謁六祖登南華仙山一見五色羽雪樹兩摘南枝花  
赤魚白蟹筋屢下黃柑綠橘籩常加糖霜不待蜀客寄

荔支莫信閩人誇恣傾白蜜收五稜細斲黃土栽三極

正輔分人參一苗歸種韶陽來詩本用礪字  
惠州無書不見此字所出故且從本奉和

朱明洞裏

得靈草翩然放杖凌蒼霞豈無軒車駕熟鹿亦有鼓吹  
號寒蛙仙人勸酒不用勺石上自有樽壘窪徑從此路  
朝玉闕千里莫遣毫釐差故人日夜望我歸相迎欲到  
長風沙豈知乘槎天女側獨倚雲機看織紗世間誰似  
老兄弟驚愛不復相疵瑕相攜行到水窮處庶幾一見  
留子嗟千年枸杞常夜吠無數草棘工藏遮但令凡心

一洗濯神人仙藥不我遐山中歸來萬想滅豈復回顧  
雙雲鴉

轍有白髮近二十年矣然止百餘莖不增不減  
虔州道人王正彥教令拔去以真水火養之  
恐不復更生從其言已數月而白髮不出更  
年歲不見豈真不生耶子瞻兄示我月中梳  
頭詩戲次來韻言拔白之驗

水上有車車自翻懸流如線垂前軒霜蓬已枯不再綠

有客勸我抽其根根根一去紫茸茁珍重已試幽人言  
紛紛華髮不足道當返六十過去魂

和

夏畦流膏白雨翻北窓幽人卧羲軒風輪曉入春筍節

露珠夜上秋禾根

或為予言草木之長常在昧明間蚤作而伺之乃見其枝起數寸竹笋尤

甚又夏秋之交稻方含秀黃昏月出露珠起于其根累然忽自騰上若有推之者或入于莖心或垂于葉端

稻乃秀實驗之信然此二事與子由養生之說契故以此為寄

從來白髮有公道始信

丹經非妄言此身法報本無二他年妙絕兼形魂

傳燈錄有



形神俱妙者乃不  
復有解化之事

十一月九日夜夢與人論神仙道術因作一詩  
八句既覺頗記其語錄呈子由弟後四句不  
甚明了今足成之耳

析塵妙質本來空

夢中於此句若  
了然有所得者

更積微陽一綫功照

夜一燈長耿耿閉門千息自濛濛養成丹竈無煙火點  
盡人間有暈銅寄語山神停伎倆不聞不見我何窮

章質夫送酒六壺書至而酒不達戲作小詩問

之

白衣送酒舞淵明急掃風軒洗破觥豈意青州六從事  
化為烏有一先生空煩左手持新蟹漫繞東籬顛落英  
南海使君今北海定分百榼餉春耕

小圃五詠

人參

上黨天下脊遼東真井底玄泉傾海腴白露洒天醴靈  
苗此孕毓肩肢或具體移根到羅浮越水灌清泚地殊

風雨隔臭味終祖彌青極綴紫萼圓實墮紅米窮年生  
意足黃土手自啟上藥無炮炙斷齧盡根柢開心定魂  
魄憂患何足洗糜身輔吾生既食首重稽

地黃

地黃飼老馬可使光鑒人吾聞樂天語喻馬施之身我  
衰正伏櫪垂耳氣不振移栽附沃壤蕃茂爭新春沈水  
得穉根重湯養陳薪投以東阿清和以北海醇崖蜜助  
甘冷山薑發芳辛融為寒食餠嚙作瑞露珍丹田自宿

火渴肺還生津願餉內熱子一洗胸中塵

枸杞

神藥不自閔羅生滿山澤日有牛羊憂歲有野火厄越  
俗不好事過眼等茨棘青萸春自長絳珠爛莫摘短籬  
護新植紫笋生卧節根莖與花實收拾無棄物大將玄  
吾鬢小則餉我客似聞朱明洞中有千歲質靈厖或夜  
吠可見不可索仙人儻許我借杖扶衰疾

甘菊

越山春始寒霜菊晚愈好朝來出細粟稍覺芳歲老孤  
根蔭長松獨秀無衆草晨光雖照耀秋雨半摧倒先生  
卧不出黃葉紛可掃無人送酒壺空腹嚼珠寶香風入  
牙頰楚些發天藻新萸蔚已滿宿根寒不槁揚揚弄芳  
蝶生死何足道頗訝昌黎翁恨爾生不蚤

薏苡

伏波飯薏苡禦瘴傳神良能除五谿毒不救讒言傷讒  
言風雨過瘴癘久亦亡兩俱不足治但憂草木長草木

金氏山房詩集 卷二十三  
各有宜珍產駢南荒絳囊懸荔支雪粉剖枕椰不謂蓮  
菰姿中有藥與糧春為芡珠圓炊作菰米香子美拾橡  
栗黃精誑空腸今吾獨何者玉粒照座光

雨後行菜

夢回聞雨聲喜我菜甲長平明江路濕並岸飛兩漿天  
公真富有膏乳瀉黃瓊霜根一番滋風葉漸俯仰未任  
筐筥載已作盃案想艱難生理窄一味敢專饗小摘飯  
山僧清安寄真賞芥藍如茵蕈脆美牙頰響白菰類羔

豚冒土出蹠掌誰能視火候小竈當自養

殘臘獨出二首

幽尋本無事獨往意自長釣魚豐樂橋採杞逍遙堂羅  
浮春欲動雲自有清光處處野梅開家家臘酒香路逢  
眇道士疑是左元放我欲從之語恐復化為羊

江邊偶微行詰曲背城市平湖春草合步到栖禪寺堂  
空不見人老穉掩關睡所營在一食食已寧復事客來  
豈無得施子淨掃地風松獨不靜送我作鼓吹

新年五首

曉雨暗人日春愁連上元水生挑菜渚煙濕落梅村小  
市人歸盡孤舟鶴蹋翻猶堪慰寂寞漁火亂黃昏

北渚集羣鷺新年何所之盡歸喬木寺分占結巢枝生  
物會有役謀身各及時何當禁戢弋者引雪衣兒

海國空自暖春山無限清氷谿結瘴雨雪菌到江城更  
待輕雷發先催凍笋生豐湖有藤菜似可敵蓴羹

小邑浮橋外青山石岸東茶槍燒後有麥浪水前空萬



戶不禁酒三年真識翁結節來此住歲晚有誰同

荔子幾時熟花頭今已繁探春先揀樹買夏欲論園居士常攜客參軍許扣門明年更有味懷抱帶諸孫

二月八日與黃燾僧曇穎過逍遙堂何道士宗

一問疾

安心守玄牝閉眼覓黃庭問疾來三士澆愁有半餅風松時落藥病鶴不梳翎樽空我歸去山月照君醒

次韻高要令劉湜峽山寺見寄

新聞妙無多舊學閒可束猶當隱季主未遽逃梅福空  
腸吐餘思靜似蠶綴簇寸田結初果秀若銅生綠荊棘  
掃誠盡梨棗憂不熟高人寧鑄金下士乃服玉君看嶺  
嶠隘我欲巾笥蓄曾攀羅浮頂亦到朱明谷旋觀真厯  
塊歸卧甘破屋故人老猶仕世味薄如穀偶從越女笑  
不怕蠻江浴驚聞尺書到喜有新詩辱應憐五管客曾  
作八州督骨銷讒口鑠膽破獄吏酷隴雲不易寄江月  
乃可掬遙知清遠寺不稱空洞腹蹇驢步武碎短瑟絃

柱促仰看泉落珮俯聽石響轂千峰瀉清駛一往無回

躅狂雷失晤語過電不容目要知僧長饑正坐山少肉

人間無南北蝸角空出縮仇池九十九

仇池有九十九泉予嘗夢至有

詩

嵩山三十六

予由近買田陽翟北望嵩山甚近

天人同一夢仙凡無

雨錄陋邦真可老生理亦粗足便回藝天燭長作照海

燭

藝天燭見退之詩近黃魯直寄詩云蓮花合裏一寸燭牝馬海中燒百川魯直蓋近有得也

食荔支二首

并引

惠州太守東堂祠故相陳文惠公堂下有公手植荔支

一株郡人謂將軍樹今歲大熟賞啖之餘下逮吏卒其  
高不可致者縱猿取之

丞相祠堂下將軍大樹旁炎雲駢火實瑞露酌天漿爛  
紫垂先熟高紅挂遠揚分甘徧鈴下也到黑衣郎

羅浮山下四時春盧橘揚梅次第新日啖荔枝三百顆  
不妨長作嶺南人

和子由盆中石菖蒲忽生九花

春萸秋茱兩須更神藥人間果有無無鼻何由識蒼蘂

有花今始信，菖蒲芳心未飽。兩蛺蝶寒意，知鳴幾蟪蛄。  
記取明年十二節，小兒休更簫霜鬚。

遷居

有引

吾紹聖元年十月二日至惠州，寓合江樓。是月十八日  
遷于嘉祐寺。二年三月十九日復遷于合江樓。三年四  
月二十日復歸于嘉祐寺。時方卜築白鶴峰之上，新居  
成，庶幾其少安乎。

前年家水東，回首夕陽麗。去年家水西，濕面春雨細。東

西雨無擇緣盡我輒逝今年復東徙舊館聊一憩已買  
白鶴峰規作終老計長江在北戶雪浪舞吾砌青山滿  
牆頭髮鬢幾雲髻雖慙抱朴子金鼎陋蟬蛻猶賢柳柳  
州廟俎薦丹荔吾生本無待俯仰了此世念念自成劫  
塵塵各有際下觀生物息相吹等蚊蚋

兩橋詩

并引

惠州之東江谿合流有橋多廢壞以小舟渡羅浮道士  
鄧守安始作浮橋以四十舟為二十舫鐵銷石碇隨水

漲落榜曰東新橋州西豐湖上有長橋屢作屢壞栖禪  
院僧希固築進兩岸為飛閣九間盡用石鹽木堅若鐵  
石榜曰西新橋皆以紹聖三年六月畢工作二詩落之

東新橋

羣鯨貫鐵索背負橫空霓首搖鬣雪江尾挿崩雲谿機  
牙任信縮漲落隨高低輓轡卷巨索青蛟挂長堤奔舟  
免狂觸脫筏防撞擠一橋何足云謹傳廣東西父老有  
不識喜笑爭攀躋魚龍亦驚逃雷電生馬蹏嗟此病涉

久公私困留稽奸民食此險出沒如鳧鷖似賣失船壺  
如去登樓梯不知百年來幾人隕沙泥豈知濤瀾上安  
若堂與閨往來無晨夜醉病休扶攜使君飲我言妙割  
無牛雞不云二子勞歎我捐腰犀二士造橋予常助施犀帶我亦壽  
使君一言聽扶藜常當修禾壤勿使後噬臍

西新橋

昔橋本千柱挂湖如斷霓浮梁陷積淖破板隨奔谿笑  
看遠岸沒坐覺孤城低聊因三農隙稍進百步堤炎州



無堅植潦水輕推擠千年誰在者鐵柱羅浮西獨有石

鹽木白蟻不敢躋似開銅駝峰如鑿鐵馬蹏岌岌類鞭

石山川非會稽嗟我久閣筆不書紙尾驚蕭然無尺筭

欲構飛空梯百夫下一杙拯此百尺泥

橋柱石礫之下皆有堅木杙入

泥中大餘謂之頂杙

探囊賴故侯寶錢出金閨

子由之婦史頃入內得賜黃金錢數

千助施卜

父老喜雲集簞壺無空攜三日飲不散殺盡西村

雞似聞百歲前海近胡有犀

豐湖舊名鰐湖蓋嘗有鰐鰍之類

那知陵

谷變枯瀆生芟藜後來勿忘今冬涉水過臍

悼朝雲詩

并引

紹聖元年十一月戲作朝雲詩三年七月五日朝雲病  
亡於惠州塋之栖禪寺松林中東南直大聖塔予既銘  
其墓且和前詩以自解朝雲始不識字晚忽學書粗有  
楷法蓋嘗從泗上比丘尼義冲學佛亦略聞大義且死  
誦金剛經四句偈而絕

苗而不秀豈其天不使童烏與我玄駐景恨無千歲藥  
贈行唯有小乘禪傷心一念償前債彈指三生斷後緣

歸卧竹根無遠近  
夜燈勤禮塔中仙

東坡全集卷二十三